

40668/3

Bath.

win 4/

D. III.

2/

17/18

Rich^d: Wright
Surgeon
April 1809.

7 A (2)

19124

Amplian
10/10/07

101

In hoc volumine continentur

- 1^o J. C. Pejeri Parerga anatomica
 - 2^o J. Münniks de Re anatomica
 - 3^o A. Cypriani Epistola anatomico-practica.
-

Sum. of Libris G. Weverjes.

ABRAHAM CYPRIANI. M. D.

*Anatomia & Chirurgia in Academia
Franequeranâ nuper Professoris.*

EPISTOLA

HISTORIAM EXHIBENS
FOETUS HUMANI POST
XXI. MENSES EX UTERI
TUBA, MATRE SALVA
AC SUPERSTITE,
EXCISI.

Ad Ampliss. Virum

D. D. THOMAM MILLINGTON

Equitem Auratum, Medicum Regium
Ordinarium, & Collegii Medicorum
Londinensium Præsidem.



LUGDUNÏ BATAVORÛM.

Apud JORDANUM LUCHTMAN'S,
M. D. CC.

THE UNIVERSITY OF CHICAGO
LIBRARY

EVISTOLA

THE UNIVERSITY OF CHICAGO
LIBRARY
1000 UNIVERSITY AVENUE
CHICAGO, ILL. 60607
TEL. 733-4331

WELLCOME

WELLCOME
HISTORICAL
MEDICAL
LIBRARY



INSIGNISSIMO VIRO

D. D. THOMÆ
MILLINGTON
EQUITI AURATO,

MEDICO REGIO ORDINARIO ET
COLLEGII MEDICORUM LON-
DINENSIIUM PRÆSIDI.

S. P. D. A. C.



Quum tuo rogatu accersituque
(Vir Clarissime) calculum
è vesica tua feliciter exci-
dissem currente anno æta-
tis 68^{vo}, Tibique post per-
actam operationem fere quotidie assi-
derem, ut sit, inter nos sermo incidit
de rarioribus quibusdam casibus qui
inter medendum occurrerant quique
ad Chirurgiam inprimis spectabant;
itaque dum inter alia tibi narrarem de
Fœtu ex Tubâ Uterinâ exsecto, ma-
tre etiam nunc salvâ ac superstitè, tu-
que à me continuo quæreres quid sit
A cur

cur hanc historiam adeo memorabilem scriptis nondum mandaverim, hoc inprimis respondebam, me, tum ob adversam, qua duos abhinc annos usus sum, valetudinem, tum ob varias peregrinationes vix tantum otii nactum fuisse, ut quæ jam dudum in adversaria retuleram in ordinem quendam redigerem. Statueram enim non solum hunc casum merito inter rariores numerandum, sed & alias quamplurimas observationes & curationes Chirurgicas minus obvias publici juris facere. Verum cum amici quidam doctissimi à me impensius efflagitent, tuque potissimum Vir Celeb. auctor fueris ut hanc Historiam sigillatim typis mandarem, Tuo inprimis desiderio morem gesturus eam commentariolo illustratam Amplissimo tuo nomini inscriptam voveo, utque qua soles humanitate æqui bonique consulas enixe rogo.

Atqui vero hic interim dolendum est, Chirurgos plerosque etiam celebres & magni nominis periculosas & difficiles operationes omni studio vitare,
haud

haud dubie verentes si res minus feliciter, & pro ægroti voto successerit ne quid detrimenti fama & existimatio apud vulgus ceperint. Hinc fit, ut morbis quotidie occurrentibus medentes & contenti ire quâ itur, lucrum ex iis quærant unde minus est invidiæ & periculi, difficiliora vero omnia recusent, nimium forsan illius memores quod in scholis inculcatur: *Incurabiles non attingendi, ne ars diffametur.* At si quæ difficiliora sunt animosius aggrederentur, profecto multos à faucibus orci ereptos, vitæ valetudinique optatæ restituerent, quos absque omni spe & solatio deferunt & insanabiles fati temere aliquando pronunciant. Horum uti plurimis saltem videbatur, insanabilium, tum in Patriâ tum hic Londini à me feliciter, Deo annuente, restitutorum, exempla non pauca, Tibi Vir Excellentissime, haud ignota sunt. Quod non ideo hic memoro ut inanem gloriam aucupari videar, sed potius ut aliis calcar & stimulum addam. Et profecto quantum inter revera incurabiles morbos & tan-

tum putatitios intersit, vel unicus hic casus palam omnibus faciet.

Uti vero corporis humani fabrica jam perfecta & numeris omnibus absoluta meritò omnes naturæ scrutatores in sui admirationem rapit, sic eadem dum *in fieri* est, hoc est hominis generatio, summi videlicet Protoplastæ opus summum, mortali intellectui imperscrutabile multo magis & attentionem & admirationem nostram meretur; inprimis si devium extraordinarium & anomalum ejusdem modum, eumque sæpius vel matri vel foetui, vel utrique simul funestum spectemus. Quamobrem & si quas in materia adeo obscura & difficili conjecturas offeram censoribus quibusdam malevolis minus probatas iri non dubitem, spero tamen me apud æquos rerum æstimatores veniam facile impetraturum. Cum enim de accretione foetus historia adhuc manca sit & à nuperis etiam Anatomicis pene intacta relinquatur; nec non in iis quæ ad tumorum theoriam & ad ossificationem spectant coactus sim *Avia peragra-*

ragrare loca vix ullius ante pedibus trita; Ecquis in re tam arduâ demonstrationes à me exigat? Si probabiles rationes & verisimiles conjecturas proponam, si denique quod dubitanter tantum adduco, Tibi & reliquis cordatioribus viris, quibus *de meliori luto finxit præcordia Titan*, non displicuisse sciam, erit quod mihi multum gratulor.

Die 17. Decembris anno 1694. vocabar Franequera Leovardiam invisurus uxorem Henrici Lewis sub signo Capitanei Peterfon militis Prætoriani *Hermentie ten Boom* vocabulo nostro belgico appellatam. Hæc annos circiter 32 nata, & cessantibus menstruis jam tertium imprægnata ad nonum usque mensem se experta est quo ad omnia ingravidationis signa in eodem statu ac dum alias utero gereret, hoc uno excepto, quod toto illo tempore nihil lactis in mammis apparuerit. Molestior etiam ipsi videbatur & insolita gestatio, inprimis cum foetus vivacis motum fortiolem & auctum persentiret: Crevitque maxime mole-

stia gestationis cum loco non consue-
to sed paulo altiori situm esse foetum
deprehenderet, ubi vero instaret par-
turiendi tempus tum magnos dolores
sensit, tum etiam motus in foetu ve-
hementiores, adeo ut jam partus ap-
propinquare videretur: verum omnia
irrito prorsus successu. Nam præter
crebras & magnas infueto in loco mo-
tiones nullus foetum egerendi conatus
adfuit; neque ulla Aqua Amnii efflu-
xit. Exinde omnis spes partus legi-
timi evanescebat, & cessante tunc o-
mnis foetus motu, ac paulatim melius
se habente ægrâ foetum in hoc in-
stanti fato cessasse non est quod dubi-
temus.

Elapso mense decimo fluxerunt de
novo menstrua per totam gestationem
suppressa, neque jam amplius motus
aliquis in foetu deprehensus, sed pon-
dus tantum iners & incommodum.
Hæc indies augebatur molestia sed
præcipue circa mensem decimum octa-
vum ea fuit symptomatum ingrave-
scentia, ut lecto decumbere Muliercu-
la cogeretur. Paulo post de dolore
acu-

acuto circa umbilicum partesque vicinas conqueri cœpit; Huncque dolorem duabus septimanis ante fœtus extractionem ulcus fungosum in regione umbilici subsequebatur. In consilium vocatis Medicis ac Chirurgis in varias itum est sententias. Aliqui fœtum in utero latere putabant repugnantibus aliis; quidam de Hydrope; quidam de excrescentiâ interna loquebantur.

Mensis erat à prima conceptione vigesimus primus cum ego advocabar Leovardiam comitante Cl. Collega P. Latané Medicinæ practicæ Professore nec non quibusdam Academiæ Franqueranæ studiosis, qui una cum Celsiff. Principis Nassoviæ Medico primario ac Chirurgo, & N. Simonide Chirurgo ægræ clinico operationis insolitæ, ac præsertim eventus felicissimi testes fuerunt.

Ego cum primum ægram conspexissem, & tam præteriti quam præsentis ejus status circumstantias omnes ad examen revocassem, eam fœtum mortuum gestare asserere non dubita-

vi; neque defuerunt signa assertionis
meæ veritatem demonstrantia. Dum
enim attentius omnia rimarer; depre-
hendi ventris intumescentiam inferius
paulo in acumen desinentem, & cor-
pus gravidum minus tamen tensum
æmulantem. Insuper compresso for-
titer utrinque ambabus manibus abdo-
mine magnam sensi duritiem, quæ ad
Peritonæum usque pertingebat. Hæc
autem durities evidenter magis obser-
vabatur circa ulcus inferius, quod
fungosum existens stylum facile admi-
sit, quo durum quid attingere mihi
videbar. Hinc dilatato tantisper ori-
ficio digiti minoris apicem immisi,
eoque foetus os parietale me contin-
gere mihi indubitanter suadebam. Ex
iis audacior factus, & de situ etiam
securus foetum in tubâ dextrâ uteri la-
tere nulla mora pronunciavi, ægram-
que admonui, si sectionem admittere
vellet, spem adhuc aliquam salutis su-
peresse, cum cæteroquin mors mise-
randa eam præstolaretur. Ipsa interim
jam sese movere non poterat, aut ali-
menta capere, verbo morti vicina:
ita

itaque admonitioni meæ faciles præbuit aures , atque constanti animo se quodlibet passuram dixit , ut quamprimum foetus eximeretur. Omnibus igitur ad excisionem paratis ægram cum lectulo in mediam cubiculi partem deferri jussi , ut non solum utrinque famulis auxiliatrices manus porrigentibus locus foret , sed etiam ut eo facilius omnibus copia fieret novi hujus spectaculi. Et ut obiter hoc notem , cum ego non incurvatus aut sedens sed pedibus stans atque erectus operationes Chirurgicas majoris momenti peragere consueverim , utpote quod convenientissimum in similibus casibus multoties expertus sim , lectum in quo ægra decumbebat ita elevari jussi , ut pedibus insistendo sectionem commode instituerem. Deinde hoc modo procedebam.

Introducto per ulcus stylo abdomen à latere dextro aperui , ac indicem digitum immisi : ubi vero me intra tubæ fallopianæ cavitatem pervenisse deprehendi juxta rectitudinem lineæ albæ , forcipe supra digitum posito deor-

sum versus scissuram feci , quantam una vice poteram. Tunc foetus illico in conspectum venit isque justæ magnitudinis. Hunc ut facilius absque ulla vi eximerem , aperturam utrinque produxi ad pedalem usque longitudinem , manuque sinistrâ leviter premendo intestina , alias operationem turbatura , si motu diaphragmatis extruderentur , in cavitate detinui , ac foetum absque multo negotio integrum extraxi. Quin etiam in majorem cautelam , ne intestina delaberentur , ægram ita collocaveram , ut superiores corporis partes aliquantulum essent depressæ ; imo in eodem hoc fere situ permanfit Muliercula , donec prorsus convalesceret ad vitandam scilicet Herniam Ventralem.

Factâ vero incisione caput foetus primo sese ostendebat pedibus versus Diaphragma extensis. Mediante Placentâ tenui admodum & maximâ ex parte consumptâ funiculus umbilicalis tubæ fallopianæ etiamnum adhærebat , uti mihi ulterius apparuit cum eam à tubâ digitis decorticatam egressissem.

Hu-

Hujus autem cavitas undique mucagine quadam obducebatur, materiam purulentam æmulante : Verum illa propius examinata non pus sed residuum aquæ amnii fuisse deprehendebam ; utpote parte nullâ interiori exulceratâ, ac materiâ nullo pacto foetidâ existente.

Vacua jam infantis cella nobis se in conspectum dedit peramplâ cavitate magni instar marsupii, late patens. Hinc operæ pretium duxi spectatoribus demonstrare eam partem, unde foetum extraxeram, peritonæo adnatam ita fuisse ut una quasi videretur membrana : Deinde partem hujus sacci inferiorem dextro lateri Uteri circa fundum affixam fuisse ; qui tubæ locus cum sit, neque ulla alia reperiretur, manifestum fuit in tubâ dextrâ foetum hæsisse. Data etiam copia uterum ipsum inspiciendi ac contrectandi, illum in statu naturali constitutum cum ovario ac sinistrâ tubâ prorsus illæsis jucundum fuit omnibus ostendere. Hisque conspectis non vano augurio, prout eventus docuit, pronunciavi,
fi

si modo ægra sanaretur eam denuo imprægnari posse.

Sed ut historiæ finem faciam; madefactam aquâ tepidâ spongiam in cavitationem immisi, eâque mucaginem omnem absterfi. Tum probe mundatum vulnus acu curvâ quatuor in locis æqui distantibus confui, comprehenso, præter integumenta & musculos, ipso peritonæo. Duplici autem utebar filo cerâ illito; imo ut firmior esset futura, laminam ligneam linteo obductam qua securius ora vulneris occluderentur toti incisioni ab utroque latere applicavi, ac fila supra laminas, sed non arctè ligavi. Ab eâ ligaturâ majorem quam à totâ operatione dolorem passam se fuisse dicebat ægra, quæ alioquin vix de acuto dolore conquesta est. Cæterum juxta inferiorem partem vulneris aperturam reliqui, eique turundam ingessi, ut materiæ omni secernendæ exitus pateret.

His feliciter absolutis diætam tenuem ac convenientem præscripsi ex liquidis euchymis, &c. & postquam inter me & N. Simonidem Chirur-

gum


gum ægræ clinicum de methodo ægram tractandi convenisset, reliquum curationis ipsi commisi. Paruit omnibus ægra, & sese obsequentissimam præbuit, summopere gavisa eo usque perductam esse operationem. Exinde sensim indies melius se habuit, vires etiam acquirens. Præter Chirurgos quotidie eam invisit D. Portius Sere-
niss. Principis Nassoviæ Medicus; quin & liberalitate Celsi. Principissæ ex ejus culina ægræ alimenta subministrabantur. Ego sæpius & pro rei necessitate ad eam accessi & expertus sum Vulnus illud ordinario prorsus modo sanatum, nempe separatione parietis interioris tubæ Fallopiæ. Quodcunque excernebatur non tantum per orificium inferius effluxit, sed etiam per interstitia futurarum. Separatio autem facta fuit non tubæ totius sed membranæ solummodo interioris. Exterior paulatim sese contraxit, & loco incisionis peritonæo coaluit, ac duritie suâ cartilaginem æmulabatur; id quod vulnere nondum clauso digito persentire facile poteram.

Sic

Sic post sectionem quodammodo Cæsaream convaluit hæc mulier, & tertio ab operatione mense 17^o nempe Martii 1695. domo exivit. Exinde bene se habuit & huc usque hilariter & pancratice vivit.

Postremo ne quidquam desit casui huic extraordinario, postridie Kalendas Januarii 1696. filiam feliciter peperit, iterumque subsequente anno 1697. gemellos filium & filiam enixa est, maximo indicio, sicut antea monui, tubam sinistram integram prorsus, & absque inflammatione remansisse. Quo pacto autem inflammatio post difficilem partum excitari, ac tubæ orificium occludi possit, ex subsequentibus palam fiet.

Ad majorem rei fidem atque certitudinem foetum ipsum nunc ante quinquennium exsectum, quem in liquore Balsamico etiamnum integrum servo, curiosis omnibus & novitatum studiosis ostendere paratus sum. Iconem interim hic subjungo. Foemella autem fuit, eaque ut antea dixi justæ magnitudinis. Mirum est profecto





fecto per duodecim menses absque putredine cadaver illud in tubâ latere potuisse; excepto enim capitis latere sinistro ejusdemque lateris humero, quæ partes cum è regione ulceris sitæ essent jam à materia purulenta corrodi cœperant, reliquum corpus adhuc integrum conspicitur.

T A B U L A P R I M A.

Repræsentat Fœtum sicuti in Operatione fuit extractus.

A A. Partes excoriatæ.

B. Funiculus Umbilicalis Exsiccatus.

C. Placenta.

Cum Epistola hæc de materia non adeo communi, sed rariore & vere extraordinaria tractet; non abs re fore arbitratus sum, partes ejusdem aliquas, quæ majoris esse momenti videntur, ad examen revocare, symptomatum quorundam rationem subjicere & nonnullis hujus Epistolæ articulis, commentarioli in modum, ulterius immorari.

Exempli

Exempli gratiâ.

*Quod toto gestationis tempore nihil
lactis in mammis perceperit.*

Plurima non tantum ipsi vulgo sed & aliis Medico-Philosophis præconceptâ opinione laborantibus videntur esse absurda; eaque imprimis quæ ad statum gravidarum & puerperarum pertinent: quæ tamen si accuratius examinentur, revera non absurda sed potius verisimilia & rationi consentanea videbuntur.

Sic in præsentî casu vulgo incredibile esse videtur, foeminam foetum vitalem utero continere, & tamen lacte semper carere: fovente hanc opinionem eorum hypothesi erroneâ, qui lac è mammis ad uterum pro foetu nutriendo confluere statuunt, vel qui ex sanguine menstruo retento lac generari credunt in mammis, adstipulanteque quodammodo huic dictæ opinioni falso vel non satis intellecto Aphorismo Hippocratis Sect. 5. 39. ubi inquit: *si mulier quæ neque gravida est, neque peperit, lac habet, ei menstrua defecerunt*, item alio Aphorismo Sect. 5.

37. ubi inquit Cous fenex : *si mulieri uterum gerenti mammae gracilescant , abortit.* Quia (inquit *Entius* statuens lac è mammis ad uterum ejusque membranam Amnion fluere. Apolog. Digress. 5.) nihil alimenti foetui suppeditari potest , qui hac de causa tunc moritur & per abortum ejicitur. Sic vulgus menstruorum suppressionem in corruptis , signum ingravidationis esse putat : Si motus infantis non percipiatur , ejusdem mortem significari : partus Octimestres non vitales esse pronunciat , & multa alia , quæ tamen ratio & experientia clare satis refutant. Rationibus adducendis & excutiendis inhærere nimis prolixum esset , eæ enim suo loco apud Auctores videri possunt : quid ab experientia nobis constet , satis patebit , si saltem Virorum & Virginum lactiferarum exempla consulamus : Ex his enim Aphorismum adductum Sect. 5. 39. aperte deprehendetur non esse utrobique verum , Aphorismum autem posterio-rem citatum ex Sect. 5. 37. non semper experientiæ respondere , inter alios

B

casus ,

casus, historia ex relatione Viri cujusdam curiosi & fide digni mihi communicatâ palam facit. Noverat (inquit is) nobilem puellam, quæ deflorata & etiam ingravidata à suo amasio per omnis generis remedia sibi à vetulis suppeditata, Cathartica, inquam, imo & venæsectionem profusissimam abortum facere conabatur, mense gestationis fere quinto : donec tandem eo res devenerit, ut motus infantis non amplius perciperetur, & pubi moles incumberet iners plumbei ponderis instar; mammæ conciderent, lac dispareret. Hinc foemina suspenso jam atque anxio animo, & de foetu, uti putabat, mortuo excludendo sollicita consilium auxiliumque Medici expectabat, aperte scilicet atque ingenue confessa suos conatus, quibus usa est ad foetum enecandum. Ego itaque (pergit ille) jussi ut cibus euchymis & spirituosus reficiatur, porro ut quieti indulgeat & denique abstineat ab omnibus Catharticis & evacuantibus: quo facto infans denuo se movere coepit, & decimo mense feliciter in lucem

cem prodiit. Ex hoc casu edoctus sum (inquit) & mammarum concidentiam & lactis absentiam, & motum infantis abolitum non usque vera esse abortus (juxta Aphorismum citatum) vel foetus mortui signa, atque ex iis nihilo plus certo argui aut indicari, quam foetus languorem & imbecillitatem.

Ut vel hinc pateat falsam esse veterum opinionem, quæ decrevit ex sanguine menstruo retento lac generari, foetum lacte nutriri, nec non lactis defectum abortus esse causam, atque etiam lactis in mammis præsentiam, menstruorum absentiam necessario arguere. Experimentiâ enim constat, foeminas præ terrore vel alia quacunque causâ subitaneâ abortum passas, lacte non privari; Et quamvis mulieres, quæ præ solâ debilitate abortiunt, lac non percipiant generari in mammis, inde adeo hoc fit quod eadem sit causa debilitatis ac consequentis abortus, quæ simul lactis generationem impedit, nempe ariditas quædam & inopia succorum omnibus corporis partibus necessariorum.

Quæ ratio autem in præfenti cafu fit, quod fœmina toto ingravidationis feu gëftationis tempore nullum in mammis lac fenferit, id videtur ad connexionem quandam intimam & fym-
pathiam uteri cum mammis referendum. Nam antehac bis puerpera cum in utero ipfo fœtum gereret lac ipfi non defuit, quo nunc dum fœtus in tuba hæreret prorfus caruit. Itaque mihi videtur ad lactis generationem ejufque incrementum & copiam hoc multum contribuere, quod uterus, imprimis circa finem gëftationis, in tantam molem extendatur, ut vafa ad inferiora tendentia magis folito inde comprimantur, iisque compressis fanguinis fluxus verfus fuperiora uberius afcendit : fanguine autem copiofius affluente major etiam fecretio in mammarum cellulis adipofis pinguedinem & in aliis glandulis lympham feparantibus oritur, eaque ipfa fecretio vafa magis aperta & ad feparationem magis prona reddit, accedente fuctione, frictione, & imaginatione matris lactantis circa mammas defixâ, quibus
con-

concurrentibus semel aperta & dilatata vasa in statu solito conservantur, etiam utero jam concidente & vasis non amplius compressis. Hoc, inquam, asserto facile apparet ex qua causa in præsentī casu lactis defectus oriretur: nimirum quod foetus in tuba hærens & consequenter à latere situs, vasa sanguinea, versus inferiora tendentia more solito non compresserit sanguinisque fluxum versus superiora solito majorem non effecerit. Et vero quemadmodum secretio lactis à compressione arteriarum, sic in gravidis intumescencia pedum à venis simul compressis oritur, unde major sanguinis remora circa glandulas & major secretio, præcipue in cellulis adiposis, ubi ille tardior sanguinis motus superiora versus in causa est quod loco pinguedinis, in istis cellulis, lymphæ secernatur, sicuti tardior motus sanguinis generalis, causa est secretionis lymphæ in cellulis adiposis per totum corpus, uti patet in Anasarcâ.

Dari quidem lac in mammis extra statum in gravidationis & potest & so-

let; hinc dantur non solum Virgines & Vetulæ lactiferæ, sed & Viri lactiferi. Notabilis in hanc rem historia est quam recenset Cl. Diemerbroeck lib. 2. c. 2. Anatom. Illud ipsum (inquit) liquet *Vianæ* (quæ est oppidum nobis propinquum) ubi ante annos triginta, præterpropter in diversorio ante portam sito, cui caput porcinum pro insigni est, mulier caupona, non diu post obitum mariti peperit, atque statim post puerperium extincta est superstitem relinquens infantem suum sanum: cumque illi res angustissima domi superesset, ejus mater nominata *Johanna Wyltuyt*, etsi & ipsa egena præ paupertate nutricem conducere non posset, tamen infantis filiæ suæ miserta, eundem enutriendum suscepit, ætatis suæ anno sexagesimo sexto; cum, inquam, eum vagientem, summâ cum commiseratione, mammis suis aliquoties apposuisset, eique papillam sugendam obtulisset, per fortem illam imaginationem, continuatam etiam suctionem, & contretationem, mammæ lac dare cæperunt idque paucis diebus tantâ copiâ, quæ nutriendo infanti abunde sufficeret, ita ut

vix

vix aliis alimentis indigeret : atque sic cum omnium admiratione infans lacte hujus vetulae (cujus mammae à plurimis annis omnino exaruerant & conciderant, jamque rursus, tanquam juvenculae de novo intumuerant) optime nutritus fuerit. Causae praedictae veritatem etiam non semel confirmarunt lascivae ac prurientes virgines, quae libidinosis cogitationibus totae intentae, atque tunc mammas suas saepe contrectantes ac cum titilloso pruritu fricantes, interdum virginitate illaesae, lactiferae evaserunt, quales indubitatae pudicitiae lactiferas virgines mihi bis videre contigit. Hæc praedictus Cl. Diemerbroeck. Viri autem lactiferi hodie adhuc mihi noti, apud nostrates suppetit exemplum. Hic, inquam, alioquin satis obesus & pinguis (in macilentis idem contingere vix possibile est propter humorum defectum) continua illa pressione mammarum ita easdem partes assuefecit ut lac funderent quoties voluerit, saepe cum adstantium muliercularum risu & admiratione. Est in omnibus his una eademque generationis lactis ratio, &

partes ad generationem lactis necessariae ubique eadem, nempe cellulæ adiposæ pinguedinem per structuram suam glandulosam à sanguine separantes, & glandulæ lympham ab eodem fecernentes (statuimus enim lac nihil aliud esse quam mixturam pinguedinis cum lymphâ) ubi solummodo requiritur tanta istorum duorum humorum secretio, ut omnis quantitas quæ separatur eodem tempore in sanguinem iterum non possit reduci, & cogatur per papillarum tubulos, dum abundat, foras effluere, aut saltem si tanta copia non adsit, ut multo facilius exprimi possit.

Hæc interim omnia non obstant, quin simul vasorum sanguiferorum uteri compressio supra allegata sit vera & sufficiens causa ad lactis generationem tempore gestationis. Possunt enim & solent sæpius dari plures causæ homogeneæ, subalternæ, coadjuvantes & ad unum eundemque finem tendentes, neque sibi mutuo contrariantes.

Fœtum in tuba repertum iri.

Postquam magna illa Analogia observata fuit inter partes generationi inservientes ipsius hominis & aliorum oviparorum, fœtusque in tubis hærentes apertis cadaveribus sæpius reperti sunt (quod & in hoc casu in muliere viva licuit videre) nullus est, qui amplius dubitat tubas uteri esse ductus per quos fœtus ab ovario ad uterum transit; sed quæ sit causa cur fœtus jam in tubam illapsus non semper ad uteri cavitatem usque protrudatur, sed aliquando in tuba hæreat & quidem ibi debito incremento augeatur, id quidem examinare operæ precium duxi. Hujus itaque rei duplicem statuimus causam naturalem nempe & accidentalem. *Naturalem* illam nomino, ubi tuba vitio connato malæ conformationis non sit pervia circa uteri introitum & sæpe adeo angusta, ut ne quidem flatus circa extremitatem fimbriatam immissi penetrare, & ad uteri cavitatem procedere queant. *Accidentalis* illa est, ubi à casu aliquo v.

g. post partum difficilem, vel alia quacunque de causa, tuba inflammatione correpta est, unde ejus insertio coa-
luit, transitusque ad uterum interce-
ptus fuerit. Omnes enim partes &
præcipue canales atque ductus corpo-
ris nostri ubi privantur humore eos
naturaliter humectante coalescunt. Sic
etiam tuba Fallopiana constans tunica
interna glandulis referta, eum in fi-
nem ut è glandulis hisce continuo exu-
dante liquore conglutinatio præcavea-
tur & ductus suus lubricus reddatur,
atque sic ovis in eandem devolutis fa-
cilis in uteri cavitatem pateat transi-
tus: si, inquam, in tuba dicta casu ali-
quo & violentiâ externâ inflammatio
oriatur, per inflammationem hanc se-
cretio glandularum debita impeditur &
sic coalescentia oritur. Casus autem si-
milis ex violentia externa sæpe numero
accidit illorum culpâ, qui manus auxi-
liares parturientibus præbent, præcipue
ubi placentam magis solito adhæren-
tem per funiculum umbilicalem avel-
lere conantur ignari interim quis ve-
rus sit & maxime idoneus separandi
mo-

modus. Hinc fit ut totum uteri fundum violenter interdum trahant, & consequenter tubis simulque aliis annexis partibus vim inferant; unde necessario sequitur inflammatio. Inflammationis autem effectum esse coalescentiam, observarunt haud dubiè illi quibus licuit plurima cadavera aperire; sic semper videmus post pleuritidem pulmones eo loci pleuræ adnatos, ubi pleura inflammatione correpta fuit, sic post frequentia tormina ventris intestina sibi invicem & cum peritonæo sæpius coalescunt. Ratio ubique eadem est; nam sicuti pleuræ ita etiam peritonæi facies interior multis gaudet glandulis, quæ continuo partes irrorant, hinc dum vel pleura vel peritonæum inflammatione corripiuntur, nihil hujus humoris necessarij debite constituti à sanguine separatur & consequenter partes, ob defectum irrorationis atque lubricationis debitæ, mediæ collabuntur & coalescunt. Idem est de omnibus cavitatibus nostri corporis judicium.

Tubas autem Fallopianas non solum
cir-

circa uteri introitum claudi & cohærescere observamus, sed etiam circa extremitatem earundem fimbriatam, & magis apertam : Id quod licuit mihi observare in foemina quadam, quæ cum quarta jam vice pareret, ex difficili partu, sed multo etiam magis quod ab imperita obstetrice dum Placentam paulo arctius Utero adhærentem extraheret violentissime tractaretur, in tantos dolores infimi ventris ac præcipue circa lumbos incidit, ut totos 15. dies jaceret moribunda & pro deploratâ haberetur, verum ipsa satis robusta cum esset & doloribus ferendis par, adhibitis opportunis remediis, præter spem & expectationem omnium feliciter evasit, & decem post annos superfuit : circa lumbos autem insignem debilitatem semper sentiebat, & exinde sterilis permansit. Ejusdem hujus foeminæ, tandem mortuæ, cadaver cum mihi forte fortuna liceret aperire ut subitanæ mortis causam inquirerem; hanc interim notatu dignam sterilitatis causam inveni nempe coalitionem extremi-

A. *Uteri fundus*
B.B. *Tubæ fallopianæ*
C.C. *Tubarum extremitates*
fimbriatæ coalitæ et clausæ.





mitatis fimbriatæ tubarum , ortam ab inflammatione qua partes utero contiguæ correptæ sunt post partum ultimum laboriosum & male administratum.

Ex hoc & similibus casibus abunde liquet , quam exitiosum sit in partu difficili obstetricibus uti imperitis , aut etiam Medicis vel Chirurgis non satis exercitatis : cum Patientes , etsi forte superstites maneant , hujusmodi accidentia , & quandoque etiam pejora ad mortem usque comitari soleant. Porro ab hac male administrata operatione alia adhuc Tubis imbecillitas accidit , quæ applicationem partis fimbriatæ ad ovarium impedit , & propter quam Ova nequeunt ad uterum usque protrudere ; paralyxis nempe fibrarum motricium exterius Tubam amplectentium earumque motui peristaltico inservientium. Hæc , inquam , ab enarrata jam causa facillime oboritur , nempe ubi nervi in parte inflammatione correpta concreescunt , & inutiles redduntur.

Perspectis jam causis quarum ratione

tione quandoque foetus in tuba hæreat neque ad uterum progrediatur: reliquum est ut paulisper expendamus quomodo foetus interiori tubarum tunicæ sua cum placenta affigatur, ibique æque ac in utero suum acquirat incrementum.

Id quod ut facilius intelligatur, primo opinionem meam quomodo id ipsum in utero contingat tradam, ac tandem analogiam inter uterum & tubas demonstrabo: ubi satis clare elucescet modus incrementi foetus in tuba. Postquam ergo tot Viri illustres circa enodandam generationem hominis in ovo laborarunt & illam satis clare demonstrarunt, nullus videtur dubitandi locus amplius restare, cum manifestum sit, foetum in ovo omnibus suis partibus absolutum & quidem membranis cum placenta munitum, (quoad primam Ideam & delineationem in germine hæc intelligo) ab Ovario per Tubam Fallopianam ad uteri cavitatem protrudi, ibi remanere & incrementum suum habere. Hoc autem incrementum Ovo accedere

dere ab ipso loco cui adhæret, seu uteri ipsius, seu tubæ inde sequitur, quia illud Ovum non tantum substantiæ in se continet, quanta requiritur ad nutritionem incrementis foetus, cuius contrarium quidem observare est quotidie in ipsis proprie oviparis, quorum ova tantum spatii continent, quantum toti materiæ sufficit quæ in incrementum pulli in cicatricula hærentis converti debet. Ut ergo Foetus ab Utero recipiat humores ad sui incrementum necessarios, debet illi quasi affigi & ut ita dicam quodammodo inclavari, adeo ut deinceps efformentur tubuli aut continui ductus ex utero in foetum quibus mediantibus humores imo ipse sanguis tandem communificentur.

Qua autem ratione illud fiat demonstrare *hoc opus hic labor est*. Et certe dolendum est à cadaverum apertione populum usque adeo abhorrere ut non liceat satis frequenter inspicere ac perscrutari corpora mortuorum imprimis vero gravidarum. Neque enim dubito quia multò plura circa generatio-

tionem possent detegi, si frequentius prægnantium cadavera liceret examinare, & præcipue quidem abortientium, vel alio quocunque morbo ad uterum gravidum spectante extinctarum. Plerumque enim partium structuram melius observamus in corporum statu præternaturali ac morbofo quam sano: cujus exempla hic plura possent adduci sed ad rem. Itaque videtur esse explicatu admodum difficile quomodo ante dicta illa insitio sive inclavatio placentæ in utero fiat. Sententiam autem meam super hac re breviter in sequentibus explicabo. Atque imprimis experientia teste videmus, postquam ova aliquot dies nondum utero alligata, sed libera ac mobilia fuerint, eorum superficiem externam, præcipue loco placentæ, villosam fieri, ipsisque filamenta quædam fluctuantia, levissimi musci ad instar, adnasci; quæ quidem filamenta, intra superficiem antea compacta, ubi ovum ad majus spatium, uteri nempe cavitatem pervenerit, humiditate ibi contenta

tenta lubricantur & quasi evolvuntur ac extricantur. Eadem hæc filamenta pro tubulis esse habenda arbitror ad humorem percipiundum apta, instar tenuissimarum fibrarum in radicibus humores nutritios è terrâ ad corpus plantæ vel arboris deferentium: illos attem tubulos recipiendis humoribus necessario inservire qui in superficie internâ uteri glandulosâ naturaliter fecernuntur: Tunc præcipue ubi ovum motu intrinseco humorum in se contentorum in tantam magnitudinem excrevit, ut latera vicina uteri premat, utpote quorum interna cavitas fabæ majusculæ dimensionem ordinario non excedit. Ex hoc mutuo attactu, non sine aliqua compressione, fit ut superficies externa Ovi quasi detracta pelle, præcipue loco placentæ, superficiei internæ uteri agglutinetur, & tubulorum in ovo hærentium pars aliqua (nempe quæ ad hanc rem satis sit) cum poris secretoriis glandularum in interna facie uteri consitarum uniatur, tandemque continui ductus fiant: eodem

C

pla-

plane modo quo videmus coalescentiam aliarum partium contingere: ex. gr. malarum cum gingivis ubi earum alterutra est ulcerata vel excoriata, (id quod semper accidet hoc in casu nisi frequenti lotione impediatur continuus ille contactus) sed hisce diutius immorari supervacuum est, cum ex pluribus in Chirurgiâ huius generis exemplis idem elucescat. Hæc vero filamenta vel tubulos, venas placentæ ad venam umbilicalem tendentes subintrare supponimus eodem modo quo vasa lymphatica per poros obliquos foras intro transeuntes, in venas ingrediuntur, iisque omnes humores in cavitatibus corporis nostri existentes inferunt. Certum enim est fere omnes humores ad certos usus secretos in massam sanguineam iterum reverti: sic lympham ex superficie internâ peritonæi glandulosâ perpetuo stillicidio depluens ad faciliorem partium contentarum motum & earum concretionem impediendam in venas ubique per cavitatem infimi ventris & superficiem membra-

na-

narum sparsas redit : eosque meatus obstructos pro ordinariâ causâ Ascitis habemus ; eodem prorsus modo lymphâ in membranâ glandulosâ cerebri secreta & in ventriculis & interstitiis ejusdem contenta in sanguinem iterum regreditur ; quo regressu impedito in infantibus , quibus propter interstitia membranacea cranium potest dilatari, Hydrocephalos oritur: in adultis autem ubi cranium extendi non potest , hujusce liquoris circulatio impedita apoplexiam insanabilem & mortiferam infert, cerebro à nimia ejus quantitate compresso. Denique eadem ratione multorum morborum causa & origo ex hoc fonte derivari potest.

Suppositis itaque hisce omnibus quæ superius recensita sunt , nempe succum in superficie uteri interna naturaliter secretum , venas placentæ subintrare , eumque ad foetus incrementum & aquæ in amnio contentæ generationem inservire , sequitur corpus uteri magis magisque debere extendi , & ipsius substantiam extricari & evolvi , vasaque etiam eidem inhærentia prius clau-

sa & sanguinem nondum admittentia tum demum aperiri, atque eo pacto circulationem per majorem peripheriam fieri. Omnes enim partes totius nostri corporis ex vasis sunt conflatae, quorum plurima semper humores vehunt, uti majores Arteriæ, venæ, nervi &c. aliqua autem tantum in statu morbofo, ut in inflammationibus partium molliorum & in exostofi ipsorum ossium; ubi non solum vasa membranarum sanguinea, quæ prius quam in ossa mutarentur erant aperta, formati autem ossibus clausa & indurata, iterum aperiuntur; sed & ipsi nervi in substantia ossea oblitterati rursus spirituum influxum admittunt ossibusque sensum eundem reddunt, quo antea sub forma membranarum ante ossificationem gaudebant; Alia tandem sunt Vasa quæ non nisi certis temporibus dilatantur: sic videmus in fœtu nascendo & recens nato sanguinem implere vasa minima cuticulæ, in eaque circulari, & totam rubore perfundere, quæ vasa tamen nato fœtu, pauco post tempore elapso, ab aëre ambien-

biente eademque comprimente ita clauduntur ut rubor penitus evanescat. Exterior enim hic aër sua compressione sanguinem cogit versus interiora, ita ut ille postea in minori peripheria circuletur, hinc motus cordis & arteriarum sanguinem ulterius protrudere non valet, quod quidem poterat in utero matris adhuc foetu hærente, & nullo aëre ambiente unde Vasa capillaria comprimerentur. Hic loci etiam observare est, vasa uteri quæ extra statum gravidationis membranæ fere exanguem componunt, eadem tempore graviditatis evolutis uteri tunicis aperiri & sanguinem uberiores vehere, eumque tantâ copiâ, ubi menstrua statim temporibus non fluunt, versus foetum dirigere propter vasa jam magis patentia, ut major jam oriatur pressura in glandulas uteri, usque adeo ut quæ in principio lympham tantum foetui communicarant ab influente sanguine dilatentur, & tandem ipse per eos fluat, perque ductus jam descriptos ad venas umbilicales deferatur, tantâ quantitate quanta ad foetus in-

crementum liquorisque in amnio secretionem est necessaria. Ejusmodi sanguinis transitus per poros secretorios in pluribus partibus corporis nostri, quodcumque est in statu aliquo morbofo, observatur, experientia & praxi quotidianâ testante; v. g. in renibus, si forte exhibeatur nimia diureticorum acrium (uti cantharidum &c.) quantitas. Neque enim est quod credamus tunc extremitates vasorum sanguiferorum (quas non admittimus) uti volunt aperiri sed tantummodo ipsius medicamenti acrimonia poros vasorum glandulas componentium, quasi tot terebris ita dilatarî, ut non solum humor secernendus, sed & ipse sanguis transeat. Idem mihi licuit videre in foemina cui à lochiis retentis sanguis tantâ violentiâ & tantâ quantitate superiora versus ruebat, ut per vasa oculorum secretoria loco lymphæ lacrimæ sanguineæ magna copia effluerent: Idem observabatur in ejusdem foeminæ glandulis ad os pertinentibus & præcipue quidem ad gingivas, quæ instar spongiæ com-

compressæ undique sanguinem emittebant; sic sanguis loco sudoris excernitur, ubi præ nimia anxietate major sanguinis determinatio est versus corporis peripheriam, quorum omnium eadem est ratio. Hoc tantum differentiæ inter allata exempla & casum nostrum intercedere videtur, quod iste quidem sit naturalis, exempla autem de statu morbofo agant, ubi non tam facilè remedia adhibita operantur, inde adeo quod etsi jam causa sit ablata, poritamen non facilè claudantur, & ad pristinum statum reducantur; nulla, inquam, talis difficultas est in puerperis ubi excluso foetu & secundinis, brevi tempore uterus rursus ita coarctatur ut vasa illa omnia quæ dilatato utero aperta fuerant iterum occludantur, eorumque tubuli & canales ad sanguinem recipiendum inepti reddantur. Plura hic possem addere de menstruorum & lochiorum fluxu; sed cum hæc non sint hujus loci, pergam ad examen tubarum, ut pateat quæ sit analogia earum cum utero, & quomodo in iisdem foetus

etiam suum habere potest incrementum. Diximus uteri faciem internam esse glandulosam talemque structuram requiri ad inclavationem placentæ, eadem autem ipsissima conformatio reperitur in tuba : diximus exiguitatem cavitatis in utero multum contribuere & necessariam esse, accedente mutuo illo & continuo contactu ut fiat coalescentia, atqui eadem cavitas paulo minor est in tubâ, ita ut facilius huic placenta possit accrescere : diximus vasa dari in substantia uteri, quæ pro ratione dilatationis uteri aperiuntur & sanguinem recipiunt, eadem ipsissima reperiuntur in tubâ quamvis non æque magna, sed interim satis patentia, uti docet experientia in præsentī casu.

Hæc vero vasa tam uteri quam tubæ sunt innumera, quorum paucissima pars in statu non gravido sanguinem admittit reliquisque tunc non patentibus & visum fugientibus, quæ tamen ex imprægnatione dilatantur ac per appositionem particularum nutritiarum sanguinis ampliora & firmiora fiunt,

fiunt, unde in tantam molem in quam hæc tuba excreverat potuerint extendi; cum enim nunquam vasa in corpore nostro formentur de novo, non possimus sine admiratione observare ex quam ingenti vasorum imperceptibilium copiâ singulæ partes corporis sint conflatæ, sicut in hac tubâ naturaliter exiguâ sed in hoc statu in immensum extensâ, conspicuum est: verum non semper, uti in hoc casu, accidit ut vasa integrâ maneant & absque disruptione extendantur: dantur enim exempla, teste Vassalio apud Dn. de Graef, ubi tubam (pro alia matrice habitam) ruptam fuisse post mortem apparuit, procul omni dubio à nimio impetu sanguinis affluentis in vasa ad subitaneam illam dilatationem à natura non destinata; Eâdem de causâ fœtus in abdominis cavitate re-
 pertos subinde fuisse credo; ruptâ enim tubâ, placenta, quamvis adnata, pondus fœtus non potest ferre; nam & in ipso utero si fœtus ab aquâ amnio contentâ cui innatat non undique sustineretur, continuo fere

foeminæ abortum paterentur. Hoc incrementum tubæ, (id quod magis admirandum est) interdum contingere, etiam ubi foetus in eadem reperitur disruptis licet vasis & destructis partibus fere omnibus ex quibus componitur, non paucis exemplis posset probari : unum tantum instar omnium, hic operæ precium duxi inferendum cujus delineationem videre licet in Tab. III.

Conspicitur hic tuba cum utero fati insolitæ figuræ, vasisque spermatidis non ordinario modo dispositis, & duplicatis etiam ureteribus ; cujus casus historiam, ad rem nostram facientem, breviter subjungo.


Filia civis cujusdam mediocris fortis & conditionis, matrimonium inierat cum viro Nobili, sed propter inæqualitatem status ab omnibus mariti consanguineis contemptui habita, tandemque ab ipso marito deserta fuit, adeo ut per aliquot annos Amstelodami sub parvo lare pauper & mœrore confecta viveret ; tandem post aliquod temporis intervallum redit maritus, sæpius

sæpius invisit fortunæ prioris restitu-
 tionem pollicitus : inter has blandi-
 tias ex iterato concubitu gravidam se
 esse mulier credidit , suspicione hac
 indies auctâ ex ventris tumore & men-
 struorum absentia (etsi ex hac men-
 sium suppressione nihil certi colligere
 potuerit , jam enim longe ante à re-
 gulari periodo defecerant.) Consan-
 guinei hac de re interim certiores fa-
 cti , maritum aggrediuntur , immutant
 animum & eousque iterum alienant à
 conjuge ut nec promissis staret , nec
 miseram unquam amplius mulierem
 inviseret. Atqui postrema hæc mari-
 ti averfatio priore longe gravior tan-
 to mœrore uxorem afflixit ut ipsa toto
 graviditatis suæ (sic quidem putabat)
 tempore tristis semper & melancholica
 videretur , diesque summo cum tædio
 tereret ; Elapsis tandem novem men-
 sibus nullum successit puerperium ; at
 obstetrix eam invisens gravidam esse
 credebat , quamvis nullum infantis mo-
 tum percepisset unquam , opinionis
 suæ rationem istam afferens , nempe
 quod foetus unâ cum matre langueret ,
 &

& præ debilitate se movere non posset. Cum vero elapso tempore non pareret, Hydrops laborare putabatur, & quod sequutum est totum biennium, continuo remedia varia contra hydro-
pem incassum tentabat. Cumque jam monstri instar in lecto jaceret, & propter ventris incredibilem molem atque tumorem, vix omnino corporis partes tam superiores quam inferiores conspici possent, advocabar ego ad paracentesin instituendam; simul autem ac ægram in hoc statu viderem, manus ab operatione consulto equidem abstinui (utpote qui summa pro temeritate semper habuerim in Ascite firmato Paracentesin attentare. Sed de his alibi) Foeminæ hujus cada-
ver, cum paucos post dies fatis cessisset, aperui, & vel minimam quantitatem aquæ in ipsa cavitate abdominis nullam reperi, sed totum illum tumorem monstrosus nihil aliud fuisse quam tubam uteri in immensam molem extensam, atque in se continen-
tem præter propter 150. libras aquæ quas inde exhausimus: sed quo me-
lius



Tab. iij.



lius omnia & accuratius examinare possem, tubam hanc cum utero annexo domum, data venia, mecum retuli & ad vivum delineari curavi, potestque ipsa pictura apud me videri, hic autem prout illa est æri incisa conspiciatur.

T A B U L A T E R T I A.

- AAA. Tuba Fallopiana dextra aquâ repleta.
- bb. Duæ cavitates uteri.
- c. Isthmus intra duas cavitates uteri.
- d. Orificium internum uteri.
- e. Tuba Fallopiana sinistra intra duas cavitates uteri hærens.
- f. Vesica.
- gggg. Ureteres duplices ab utroque latere.
- hh. Arteriæ spermaticæ.
- ii. Venæ spermaticæ.
- l. Vena spermatica ex ipso rene oriens.

Substantia tubæ membranacea exhausta aqua ultra triginta libras pendebat. Ejusdem portio ab interna facie conspicua exhibetur in Tab. iv. diversi generis substantia ibi conspiciatur nempe a. a. a. sunt tumores carcin-

no-

nomatosi à materiâ intra glandulas tubæ contentâ exorti. Nam inter schir-
rosum , cancrosum seu carcinomatofum
& alium quemvis tumorem in absces-
sum degenerantem , nullam prorsus
differentiam agnoscimus, quam quod
materia cancrum efficiens sit liquor se-
cretus adhuc in corpore glandulæ con-
tentus & cum nullo alio humore mix-
tus, obstructo vase secretorio, qui li-
quor ibi continuo crescens & propter
firmitatem membranæ glandulam com-
plectentis non erumpens, nullamque
aliam viam in sanguinem redeundi in-
veniens, non potest resolvi, ibique
crassescit & glandulas induratas, nul-
lique amplius emollitioni aut discus-
sioni contentorum auscultantes efficit.
Hinc in pus converti non potest; ad
puris enim confectionem requiritur
mixture diversorum humorum, ut po-
stea suo loco videbitur. Tumores au-
tem in glandulosis partibus suppura-
tionem subire apti, fiunt ab humori-
bus jam per vasa secretoria extra glan-
dulas productis, ibique extravasatis, &
cum diversæ naturæ humoribus com-
mix-

mixtis , de quibus alibi ex professo. b. b. b. est lymp̃ha in gelatinæ formam mutata , & procul dubio in glandulis tubæ secreta.

Antequam autem hanc historiam deferam , libet insuper quid sentiam de hujus tubæ in tantam molem intumescentis causa in medium proferre , & non dubito , quin in principio gr̃vida fuerit illa foemina , & foetus hæserit in tubâ , ibique non magnum cepit incrementum , sed brevi post conceptionem extinctus sit , quem tamen propter exiguitatem & substantiæ tubæ perturbatum chaos in dissectione videre non licuit. Mortuo jam foetu propter inclinationem majorem sanguinis jam factam ad illam partem & vasis jam aliquomodo magis dilatatis , tantus sanguinis fuit impetus in glandulas internam tubæ tunicam construentes ut continua ibi facta fuerit secretio lymphæ quæ tandem hunc Tubæ hydropem peperit ; nimirum quod lymp̃ha illa nullas in sanguinem redeundi vias invenire poterat , & tubæ insertio in uterum erat occlusa ,
id

id quod patet ex figura tertia, ubi uterus à parte ipsius tubæ obturatus apparet.

Placentam exsiccata & in membranaceam substantiam mutatam vidimus.

Id quod necessario debebat sequi: nam post elapsos novem menses mortuo jam foetu nulla amplius sanguinis circulatio continuari potuit; Et quamvis placenta conatu foetus exitum incassum quærentis non esset separata à tuba, ut ab utero fieri solet in partu naturali, sanguis tamen in ea circulari non potuit, nec ex parte matris, quia sanguis maternus ad venas placentæ perveniens atque ibi sanguini foetus jam stagnanti occurrens motum proprium amittere debet: quia quamvis fatis magna pressione in ductus communicationis jam descriptos influere conetur, sanguinem tamen foetus in motum ciere non valebat, sed jam extra peripheriam circulationis tubæ in ductus communicationis derivatus ibique hærens & regredi nescius

sciùs in membranaceam substantiam
faceffit ; eadem prorsus ratione qua
videmus , infante jam nato , simile
quid fieri in vasis umbilicalibus : ubi
nempe sanguis ab ipso umbilico (jam
scilicet ligato) usque ad arterias cru-
rales stagnans , cum contra motum
proprium per arterias umbilicales re-
gurgitare nequeat , tandem exsiccatur
atque in membranaceam substantiam
& ligamentum mutatur. Hujusmo-
di mutatio sanguinis pedetentim &
gradatim facta in vitulis [præ aliis
animalibus] quotidie potest observa-
ri. Est porro quiddam (hic obiter
notandum) quod ex prædictis quam
clarissime patet , nempe sanguinem ri-
te mixtum & particularum ipsum com-
ponentium debita proportione con-
stantem , quamvis etiam stagnaverit ,
non solum non mutari in pus , sed
etiam non putrescere ; de quibus ali-
bi. Hæc placenta maxima ex parte
exanguis facta & in membranam mu-
tata ac cum tubæ substantia quasi u-
na effecta , non potuit alias , quam
ex parte , à tuba in operatione per me

instituta separari uti eam delineatam videmus. Denique hæc placenta & tubæ concretio, atque in unam eandemque membranam mutatio, non obscure demonstrat vasorum in iis continuitatem: si enim partes istæ tantum essent contiguæ [uti multi volunt] & simplici solum suctione placenta aliquid ab utero vel tuba recipere, procul dubio perfecta hujusmodi in unam membranam mutatio, uti in hoc casu videmus, non oriretur, sed partes istæ potius mortuo infante sponte secederent atque etiam in hac operatione facilius ab invicem separari potuissent.

Molestior ipsi videbatur gestatio.

Hanc molestiam à loci angustia & sublato corporis æquilibrio deducimus; tuba enim in quibusdam diversam plane ab utero habet structuram, & vasa ipsius non sunt à natura disposita ad facilem illam evolutionem quæ reperitur in utero. Hic enim lintei complicati & in parvum globum compressi ad instar facile in planum latius exten-

extenditur. Hinc vel minimus infantis in tuba hærentis motus insolitam molestiam inferre debuit. Præterea corporis æquilibrium ablatum non parum molestiæ necessario creavit ; scimus enim quam molestum sit onus aliquod inæqualiter à quacunque corporis parte externa libratum : quâ de re experientiâ quotidie docemur à bajulis, qui incredibile pondus dorso & capiti impositum commode satis portant absque magno molestiæ & defatigationis sensu, dummodo illud ipsis ad æquilibrium imponatur, quod si secus fiat impossibile est ipsis vel momento temporis sustinere. Hinc ergo non est quod dubitemus, corpus infantis non in centro abdominis sed à latere positum maxime ægræ onerosum fuisse magnamque molestiam ipsi attulisse.

*Non est quod dubitemus fœtum
tunc mortuum fuisse.*

Quæritur hic : quare infans iste cui nulla exeundi patebat via, cui nihil nutrimenti deërat, nihilque aquæ ef-

fluxerat, uno verbo, cui nihil demtum erat, non diutius vixit, sed præcise elapsis novem mensibus mortuus est, cum tamen de partibus decimestribus & undecimestribus &c. satis fide dignæ historiæ extent. Respondeo, ubi partus tempus ultra nonum mensem protrahitur, certum est foetum esse debilem, ejusque partium incrementum lentius solito fuisse factum, & hoc ipsum quidem foraminis ovalis tardio rem in corde diminutionem atque conniventiam arguit. Hujus enim foraminis minorationem pro maximâ maximeque genuinâ causâ motus exitum parantis seu calcitrantis foetus & dilacerationis membranarum habemus. Ubi nimirum hoc foramen ovale fit minus, tunc & sanguinis fluxus in pulmones necessario debet esse major, hæcque major sanguinis quantitas non potest transire, nisi vasa pulmonis ab aëre inspirato comprimantur, sicque in illis acceleretur sanguinis motus & circulatio. Quod si secus contingat, cordis motus perturbatur, & functiones necessariae irre-

re-

regulariter procedunt, tandemque moritur infans, quæ omnia etiam foetui intra tubam concluso necessario accidebant.

*Mense decimo iterum fluxerunt
menstrua.*

Cum jam mortuo infante nihil amplius sanguinis ipsi suppeditaretur, ille solitas vias iterum petiit & sese per vasa secretoria more solito menstruatim nempe exoneravit. Quæ autem sit proprie hujus menstrui fluxus causa in foeminis, variæ apud auctores sententiæ proponuntur. Juxta alios, inquam, causa hæc assignatur, quod enim in uteri substantia interiore *admodum paucae sint venæ*, per quas copiae tantæ sanguinis, arteriarum beneficio affluentis (supponitur interim uterus plurimas habere arterias) circulatio commode fieri possit, & orificia tubulorum uteri sint laxa & mollia, hinc fit quod redundans sanguis, qui ob copiam satis cito circulari nequit, per dehiscentia & aperta tubulorum orificia, nec non per fines vasorum in

collo uteri hærentium ut supervacuus & Naturæ suâ copiâ molestus, foras effluat. *Alii fermentum certum uterinum* pro causa assignant & statuunt materiam quandam fermentariam in liene, hepate, pancreate, glandulis, aliisque partibus progigni quæ unâ cum sanguine per arterias aut per vasa lymphatica ad uterum delata, atque ibi partitè deposita & paulatim coacervata [semper enim in dissectis viscosus seu mucosus quidam humor invenitur] à specificâ quadam uteri proprietate peculiarem quandam qualitatem nanciscitur, sicut eadem in ventriculo aliam peculiarem qualitatem adipiscitur qua chylus ex alimentis educitur. Itaque hæc qualitas à calore loci excitata humorem istum cui ut subjecto inhæret, in sanis mensis spatium ad tantam volatilitatem perducit ut sponte sua effervescat, specificam quandam fermentationem sanguini introducat qua totum mulieris corpus, imprimis partes utero vicinæ [in aliis magis in aliis minus] conturbantur, & sanguis superfluus turgescentiâ suâ
vaso-

vasorum orificia dilatans, foras proturbatur; qualitate autem illâ, aut dicti humoris fermentarii justâ volatilitate deficiente [uti fit in gravidis, in refrigeratis, aut longo morbo confectis &c. item in brutis] simul deficit ista menstrua evacuatio.

Alii Lunæ influxui menstruorum periodos Lunæ, inquam, humorum dominæ assignant, unde tritum illud emanavit:

Luna vetus vetulas, juvenes nova luna repurgat.

Sed missis his & aliis opinionibus, ubi quisque suo abundat sensu; sententiam meam paucis subnecto, & judico idem hic fieri quod alias tempore gestationis fieri solet, dum foetus in utero sanguine matris nutritur. Sicuti enim utero gerentibus per glandulas uteri sanguis loco illius humoris viscidi ibi continuo fecerni soliti profluere solet, itaque eodem prorsus modo in non gravidis fieri putandum est menstruis fluentibus, ubi portio sanguinis abundans exitum quærit, præcipue circa illas glandulas quæ naturaliter ita sunt dispositæ,

ut earum pori facile ab impetu sanguinis aucto dilatentur , & sanguinis motu iterum diminuto etiam facile contrahantur , ita ut tantummodo mucoso humori fecernendo transitum præbeant. Sanguinem, inquam, menstruum hoc modo profluere arbitror , non autem per extremitates vasorum apertas. (uti voluerunt veteres) Ea enim vasa semel aperta difficillime iterum clauderentur : à posteriori vero satis clare probatur sanguinem hunc menstruum effluere per poros vasorum glandulas componentium , nempe ubi examinamus statum partium v. g. in fluore albo , qui est humor in istis glandulis ordinario modo secretus sed majori quam par est quantitate: Dum enim humores more solito augentur & aliqua pars eorundem debet evacuari , & motus sanguinis est tardior in corporibus istis fluore albo laborantibus , ipse sanguis per poros secretorios non prorumpit ob deficientem aut nimis languidum ipsius motum , sed humor ille ibidem fecerni solitus majori quantitate labitur , atque

que in plurimis ægris non solum certis temporibus sed continuo foras effluit, propter nimis flaccidos & apertos poros, à continuo illo humore acri transfluente & contractionem pororum [quæ naturaliter post fluxum menstruorum contingere solet] impediēte, ita ut continuâ evacuatione, fœminæ fluxu albo laborantes præter modum enerventur, & tantum non ad tabem perducantur. Hæc cum ita sint, satis clare patet quam difficile sit dictum fluxum album curare, porosque illos debito vigori restituere, ut sese iterum more solito contrahere possint, cui nemo Practicorum non facile assentietur. Porro ad hujus sententiæ elucidationem multa possent adferri Phænomena quæ observantur sæpe numero in gonorrhæâ virulentâ fœminarum, sed de his aliâ occasione. Fermentationem in sanguine aliasque causas ab antiquis recensitas pro verâ fluxus menstrui causâ non admittimus, sed solummodo sanguinis bene constituti nimis magnam copiam exitum quærentis, ubi nempe is ad certam quan-

titatem naturæ molestam pervenit & per illas vias quæ huic exonerationi idoneæ & destinatæ sunt evacuari conatur, quales sunt ipsæ glandulæ uteri & vaginæ. Hæc exoneratio in fœminis non gravidis est necessaria; nam præter externa quædam conformationis discrimina inter virilis & fœminei corporis constitutionem ea maxime naturalis est differentia quod in fœminis, iis præcipue quæ ad pubertatem pervenerunt sanguificatio sit copiosior quam quæ ad nutritionem proprii corporis requiratur, adeo ut tempore graviditatis fœtum suo sanguine ad hunc finem redundante possint nutrire, in non gravidis autem illa nimia sanguinis quantitas, dicto modo debeat evacuari. Si enim hæc facultas plus sanguinis conficiendi tantummodo ubi ingravidantur in fœminis vigeret eademque mox à partu iterum cessaret, quomodo quæso id fieri posset absque magna & insolita naturæ fœmineæ mutatione? Verum illa sanguinis superfluentis copia atque ubertas sicuti circa pubertatem primo oritur,

tur, ita ingravescente ætate in foeminis senioribus tandem occidit, ubi natura jam non sufficit ad pleniorē illam sanguificationem. Dicimus porro Menses bono & laudabili sanguine constare & menstruali illâ evacuatione humores corpori suâ qualitate noxios uti volebant veteres non excerni, sed verum & incorruptum sanguinem qui sola quantitate molestus sit. Si enim qualitate etiam peccaret in gravidis ubi nulla evacuatio fit, gravissima, ob retentos istos humores [ex hoc supposito] symptomata, orirentur aut saltem cogeremur statuere foetum impuro nutriri sanguine: cujus contrarium tamen verisimile esse docet experientia.

Iustæ magnitudinis absque ulla putredine.

Cum jam semel foetus mediante placenta sua tubæ interiori tunicæ esset affixus, & modo jam dicto sanguinem à matre reciperet, ipsaque Aqua Amnii debitâ quantitate secerne-
retur ut tuba necessario inde deberet
vel

vel sufficienter extendi , vel rumpi , nihil erat quod obstaret quin foetus in debitam magnitudinem excreceret. Angustia loci incrementum foetus impedire nullo modo poterat , cum non corpus foetus succrescens , sed aqua Amnii pro ratione augmenti sui tam quantitate quam humiditate tubam extendat , impediatque quominus ille à tuba comprimatur. Quod enim partes membranaceæ inprimis à contento in se humido facilius extendantur quam dum eadem siccae , duræ & sibi relictæ sunt , quotidie observatur v. g. in hydrocephalo facile & absque ullo fere dolore dilatantur membranæ cranii & ossificatio impeditur ; quia contentum illud humidum vasa membranas illas componentia , laxiora efficit & influxum sanguinis promovet id quod ossificationis impedimentum est. Contrarium videmus in eo casu ubi membranæ dilatantur à corpore duro Ex. gr. à calculo in uretere hærente , à quo non solum difficulter extenditur sed intensissimos simul patitur dolores. Quemadmodum
autem

autem Aqua Amnii incremento & extensioni partium favet, ita foetum non ea sed sanguine matris nutriri & ipsius vasa quæ corpus ejus componunt per appositionem particularum humoris quem vehunt ampliari atque sic incrementum corpori accedere omnino credimus, cum satis sanguinis, uti jam vidimus, ad foetum fluat, & sanguis humoresque ab eo secreti ad omnium partium nutritionem sufficiant. Atque hinc aquæ amnii alium usum & necessitatem assignamus, nempe illam inservire uteri vel loci ubi foetus hæret extensioni, ut partes absque impedimento incrementum capiant foetusque facilius sese movere possit, & à lateribus uteri vel Tubæ non comprimatur, tum præterea quod suos quoque habeat usus tempore partus, lubricando vias exitui foetus destinatas. Aliquid hujus Aquæ Amnii per os posse intrare non omnino negamus, nempe ad humectanda interiora & dilatanda intestina, ne illa nimis contraherentur, [contractio enim intestinorum ab inediâ vel aliâ quacunque

que causâ nimis exsiccante oriri potest, quorum quotidiana videmus exempla] vel pro attemperandâ bile, succo pancreatico, humoreque & fermento in tunicis ventriculi atque intestinorum secreto. Qui humores cum à circulante omnibusque suis particulis constante jam sanguine separentur, & nihil inveniunt in quod agant, haud dubie majorem indies acrimoniam concipiunt, & hinc opportune satis à prædictâ aquâ amnii attemperantur. Ab istis etiam humoribus in intestinis foetus secretis meconium, & non à residuo aquæ amnii oriri statuimus.

At fortasse quidam hic quærent, cur foetum humanum sanguine ipso nutriri statuam & non alio potius humore sicuti pulli in ovo qui nihil sanguinis dum ova incubantur suscipiunt; Porro objicient alii in brutis plerisque animalibus cotyledones ab utero separari nullo sanguine prorumpente, ideoque minus verisimile esse sanguinem ipsum ab utero in cotyledones deferri, sed humorem prorsus alium in uteri substantia secerni ex quo in
co-

cotyledones translato, reliqua animalium genera nutriantur atque incrementum suum habeant.

Ad hæc autem respondeo, analogiam in omnibus animalibus per omnia similem non dari, sed tantam potius differentiam & tam multiplicem varietatem à summo Protoplastâ in rebus creatis esse constitutam, ut eo majore admiratione afficeremur, & agnosceremus ipsius opera esse sine fine. Et quid quæso tandem obstat quo minus etiam ovum in ovario humano posset tantam materiæ quantitatem à matre accipere, qua totus foetus posset crescere & nutriri, ac postea per ductum tubæ majorem ad uterum delabi & absque adhæsione ibi quasi incubari & suo tempore excludi? Nihil præterea impedit quin foeminæ omnino oviparæ esse possent. Ideoque hoc unum ad prædicta respondere possumus, nimirum Deo placuisse ut imper-scrutabile generationis opus, in diversis animalibus hoc modo varietur. Quocirca etsi verum esse concedatur bestias non sanguine, sed solo humore

re

re à sanguine in substantia uteri secreto nutriri, hinc tamen non sequitur idem contingere in homine. Cæteris enim animalibus nec lochia post partum nec menstrua extra tempus ingravitationis fluere solent; at vero in genere humano separatâ placentâ ante foetus exclusionem tanta sanguinis profusio ex uteri substantia fieri solet, ut brevi moriatur mater ab illâ quam tunc patitur hæmorrhagiâ & simul foetus quasi submergatur, nisi ab aliquo satis perito statim auferatur infans & in lucem producat. Hoc autem factô, uterus exoneratur dataque copia sese contrahendi sensim concidit atque constringitur, denique vasa ejus maxima ex parte clauduntur, & hæmorrhagia diminuitur. Atqui vero si nullus sanguinis ipsius transitus daretur ab utero ad placentam, unde hæc tanta hæmorrhagia posset oriri, & quare separata placenta, humor ille alter secretus non solus profluit? Sed puto hinc absque ulla difficultate posse concludi, foetum humanum ipso sanguine materno nutriri, atque ab eo nutri-

men-

mentum suum habere. Quomodo itaque foetus in præfenti casu ad justam pervenire & succrescere magnitudinem potuerit in tubâ æque ac in utero jam vidimus : sed quomodo incorruptus & integer absque putredine ad tot menses durare posset multi mirabantur, inprimis illi qui ante operationem factam ullum hic omnino foetum fuisse negaverant ea potissimum ratione persuasi, quod foetus tanto temporis spatio in corpore materno delitescens necessario corrumpi soleat ac debeat. Et quidem fatendum est hoc plerumque aut etiam semper accidere ubi foetus in utero ipso continetur, ibique moriens non excluditur, nec datâ occasione extrahitur : idque propter aëris introitum sese per uteri orificium internum insinuantis : cujus plurima exempla passim exstant. Atqui vero huic foetui in tubâ hærenti, idem non contigit ob præclusum omnem aëris introitum, qui si in tubam usque penetrare posset foetus corruptionem haud dubie accelerasset. Hujus autem rei veritas quo-

tidianâ fere Chirurgorum observatione comprobatur; nempe partes quascunque præternaturaliter affectas & in cavitate aliquâ corporis inclusas corrumpi atque suppurari, ubi aër externus illas attingere potest, sicuti contrarium evenire solet ubi aër non potest intrare. Utriusque habemus exemplum in præsentî casu ubi foetus incorruptus intra tubam usque latuit, donec ulcus ab interiori Tubæ membrana exortum ad exteriorem usque ipsius cutis superficiem serperet, cujus per fungosam & laxam substantiam particulæ aëreæ sese insinuantès primam putredinis labem intulerunt, nempe partibus ulceri vicinis atque substratis. Hoc enim ulcus si non extitisset, procul dubio foetus integer atque ab omni putredine immunis permansisset. Sæpenumero enim reperti sunt foetus in Tubis absque ullâ putredine omnino exsiccati, qui à plurimis annis ibi hæserunt atque in globum omnis externæ figuræ expertem mutati, pro molâ vel frusto carnis informi habiti sunt: cum tamen in ipsis

sis hujusmodi molis, si benè examinentur & extricentur, omnes partes foetus plerunque apparere solent, & quidem debitâ proportionè formatæ. Quæ partes suis membranis involutæ post mortem foetus à contractione tubæ sæpe ita comprimuntur ut figuram tantum irregularem & superficiem inæqualem præ se ferant: id quod frequenter licet observare in vaccis propter sterilitatem saginatis & mactatis. Idem certe accidisset & in præsentî nostro casu, si unius lateris os parietale ab inæquali pressione tubæ idem os alterius lateris non transcendisset, & suo margine ferræ ad instar, peritonæum vulnerasset, eaque ratione ulcus fungosum & aëri ad cavitatem tubæ transmittendo idoneum, procreasset.

*Nihil aquæ amnii repertum fuit,
sed materia quædam mucosa.*

Omnes liquores naturaliter in cavitatibus nostri corporis contentos in membranis glandulosis quibus continentur à sanguine secerni, & pro ratione qua

secernuntur etiam iterum in sanguinem modo supra dicto reduci, nullus dubitandi amplius restat locus. *Sic aquam pericardii* in interna pericardii superficie glandulosa à sanguine secerni & in venas reintrare credimus, eamque sic continuâ quadam vicissitudine quasi renovari; quæ si eadem semper remaneret ex stagnatione procul dubio in deterius mutata usui ad quem à naturâ destinabatur minus apta redderetur, parte scilicet ejusdem subtiliore continuo per poros æque subtiles avolante. Hinc enim crassior evaderet & cordi ad se facilius & liberius movendum non tam adjumento quam impedimento esset. Similiter *humorem aqueum* in oculo generari & circulationis legibus, more aliorum succorum, subjici experientia docet, utpote qui interdum regenerari soleat si quando forte casu aliquo effluat & effundatur. Pari ratione etiam aquam in amnio contentam toto gestationis tempore non semper eandem esse numero statuimus, eamque [præterquam quod aliquid per os intrat] ope venarum, quæ

quæ reperiuntur in membranis in sanguinem foetus reduci & ab humore ex eodem sanguine in superficie placenta internâ ac glandulosâ secreto de novo instaurari, ut utrobique verum sit tam in microcosmo quam in macrocosmo quod Poëta canit

Ut vitium capiant ni moveantur aquæ.
Exemplum hujus rei evidentissimum in hoc nostro casu suppetit, ubi aqua amnii mortuo jam foetu non amplius circulans partem suam subtiliorem per insensibilem transpirationem amisit & quod reliquum erat gelatinæ instar in tubâ concrevit; foetumque amplius à compressione satis tueri non potuit. Porro observamus etiam aquas præternaturaliter in plerisque aliis cavitatibus corporis collectas & stagnantes, colore mutato turbidas & concretas conspici. Retulit mihi Dn. D. Sylvester Med. Doct. Londinensis se hydropicum quendam apertum vidisse, cujus abdomen gelatinâ quâdam repletum esse observabatur; quin etiam ipse Amstelodami dum curationem palliativam cuidam hydrocele laboranti

adhiberem, scrotumque ipsius acu Barbettiana perforarem, ut aquam ibi contentam emitterem, nihil extraxi præter aquam tenacem, quæ non sponte effluxit. sed manuum ope & pressu quasi emulcta exstillabat, adeo ut eam solâ punctione, quod tamen aliquoties antea in eodem ægro cum successu tentaveram, evacuare amplius non possem. Quamobrem ipsi curationem eradicativam proposui, quam etsi æger antea recusasset, cum videret tamen se more solito sublevari non posse jam facile admisit. Ubi ergo totam scroti cavitatem aperirem ut separationem membranæ istius humorem continuo extillantem expedirem, & recidivam impedirem, inveni aquam diversi coloris, turbidam, eamque tenacem: procul dubio quia pars subtilior ejusdem transpirasset ob continuos fatus quibus prædictus æger tunc usus fuerat per menses aliquot, ex consilio Medici sui: quod quidem cum antea non fecerit aqua etiam antehac magis fluida reperta est. Quocirca hinc jam satis clarè patet unde in nostro

stro hoc casu illa materia mucosa fœtum ambiens totamque faciem tubæ interiorē contegens ortum traxerit, quodque eadem materia mucosa aquæ in amnio secretæ pars crassior fuerit, quæ per insensibilem transpirationem avolare non potuit, non autem materia purulenta, prouti primâ quidem fronte à nonnullis adstantium esse credebatur. Sic enim sæpenumero falluntur illi qui materiam similem mucosam in cadaveribus repertam pro materiâ purulentâ habent. Sic meminī me aperuisse abdomen cujusdam Hydropici in quo paracenthesis antea fuerat instituta ad evacuandas aquas, sed pessimo [uti solet] cum successu. Inveniebatur, inquam, ibidem similis materia omnia intestina & reliquas infimi ventris partes tegens; adeo ut ex adstantibus aliqui statim omnia intestina & reliquas partes ulceratas pronunciarent atque hinc mali successus causam deducerent: ubi vero hæc materia spongiis & aquâ tepidâ fuit ablata, nihil in abdomine ulcerosi apparuit, omnisque partium in

eodem contentarum superficies intacta
conspiciebatur : quod si nobiscum pau-
lo attentius reputemus quid proprie
& necessario requiratur ad puris con-
fectionem non tam facile decipiemur:
qua in re paucis opinionem meam ex-
ponere non gravabor. Statuimus ita-
que nullos humores corporis nostri ,
quamvis extravasatos , esse mutabiles
in pus quamdiu illi seorsim absque
commixtione aliorum humorum sin-
ceri permanent : Ideoque sanguinem
extravasatum & eâdem texturâ præ-
ditum qua in vasis fluit , inque inter-
stitiis partium sine mixtione commo-
rantem , non mutari in pus omnino
affirmamus ; id quod experientia quo-
tidiana nos docet in Chirurgiâ. Sæ-
pius enim observatur sanguinem ex-
travasatum imprimis in vertice capitis
post casum aliquot septimanas incor-
ruptum reperiri , & prorsus immuta-
tum extrahi ; ubi nempe fotibus aliis-
que ad resolutionem topicis frustra ap-
plicatis , tumores tandem aperiuntur.
Omnis mutatio quam solet & potest
in tali casu sanguis subire est , quod is
quo-

quodammodo coagulatus interdum apparet, præcipue ubi continuo fotuum usu pars ipsius subtilior avolavit per insensibilem transpirationem: Memini tamen me decimo nono post casum die extraxisse sanguinem floridum & fluidum in vertice cujusdam nautæ extravasatum, qui cum esset ebrius ex summo navis per operculum apertum, in ejusdem cavitatem vacuum ceciderat. Ille enim quamvis emplastrum de cumino continuo parti applicatum fuisset tamen quia capilli non fuerant abrafi sed forcipe tantummodo abscissi, cutemque haberet maxime induratum, inde adeo quod susque deque habitâ omni aëris inclementiâ capite aperto semper incedere assueverat, evaporatio partium subtiliorum sanguinis facta non est, eâque de causâ sanguis fluidus repertus est. Aliud exemplum addam de sanguine coagulato incorrupto reperto & incluso in eâdem membranâ unâ cum tumore carcinomatoso glandulæ parotidis, quem Amstelodami extirpavi Anno 1680. Patre meo præfente; Iste æger postquam tumore

carcinomatoso juxta aurem sinistram quatuor annos laborasset, qui magnitudine ovum gallinaceum exæquaret, ejusdem acerrimo dolore ex improviso correptus est, quem dolorem tumoris incrementum satis insolitum sequebatur, adeo ut intra sex septimanas ad pugnorum duorum magnitudinem increverit; quo tempore magnum is dolorem tensivum patiebatur, omnino distinctum à dolore lancinante, quem quandoque in tumore antea senserat. Cum jam per annum post incrementum illud subitaneum Chirurghi plurima emplastra & cataplasmata maturantia nullo cum successu applicuissent, sperantes scilicet nec absque ratione, se tumorem ad suppurationem perducturos, propter subitaneum illud incrementum, extravasationem humorum indicans; tandem ubi humorem non satis fluctuantem & maturum sentirent, ideoque tumorem aperire non auderent, nihil præter extirpationem totius tumoris [si vellet sanari æger] superesse pronunciarunt. Tunc inter alios Chirurgos Pater meus
quo-

quoque confulebatur, qui cum examinatis omnibus idem sentiret, nempe nihil præter extirpationem superesse; æger operationi, curæque patris mei se submisit. Cum itaque ego, præfente Patre meo, extirpationem aggrederer & circa basin, tumorem more solito separarem, tanta sanguinis grumosi copia prorupit, ut in mediâ operatione sistere partemque sanguine scatentem abluere coactus fuërim, quo mihi copia melius videndi fieret quid porro agendum restaret: ablutâ itaque parte tumorem reliquum ovum magnitudine æmulantem feliciter abstuli, ægerque brevi post sanatus est. Notandum hic quoque aliquid satis insolitum, nempe quod sanguis ille grumosus extravasatus & in eâdem membranâ cum tumore carcinomatoso contentus, tam arctè conclusus, & tam crassis integumentis tectus, ut suâ duritie atque inæqualitate ipse tumorem carcinomatofum referret, nihil in se tamen purulentæ materiæ continuerit. Plura hujus generis exempla satis insolita possem addu-

ducere, sed cum non dubitem quin allata abunde demonstrare possint, sanguinem extravasatum nulloque cum humore mixtum non mutari in pus, hisce supersedeo. Sic lympham etiam omnis generis non mutari in pus quotidie satis superque observatur in hydropicis, in hydrocele laborantibus, in hydrocephalis &c. neque etiam lympham crassiorē in pus mutari observamus, uti lymphā intra articulos reperta, ad faciliorem motum ossium, quæ si per accidens detineatur & in tumorem exsurgat, si sola & sincera maneat lymphæ specie aperto tumore effluet. Lymphā albuminis ovi instar crassa Ganglion efficiens nunquam ad suppurationem perducitur, cum sit liquor secretus in superficie interna vaginalum tendines amplectentium ad faciliorem tendinum in iis motum procurandum; qui propter crassitiem istarum vaginalum non facile prorumpere potest, nec propter obstructionem pororum iterum in sanguinem redire. Eiusdem generis lymphā tenax & crassa reperitur in ranulâ,

lâ, tumore sub linguâ orto, quæ nunquam mutatur in materiam purulentam, etiam si per annum & ultra ibi extravasata contineatur. Nec tantum in supra narratis, sed in aliis etiam corporis partibus similes quotidie occurrunt lymphæ extravasationes, absque subsequente suppuratione.

Pinguedo si extravasata hæreat & stagnet, per se sola & absque aliorum humorum affluxu, nullam fere subit mutationem; præterquam quod aliquando durior aut liquidior evadat; sed in pus nullo modo convertitur, uti observare licet in Atheromate, Steatomate, Melliceride &c. qui tumores per annos quamplurimos durant innoxii nullâ interim subsequente suppuratione. Denique idem de cæteris humoribus in corpore repertis esto judicium.

Ut igitur pus formetur requiritur ut humores diversæ naturæ extravasati invicem misceantur & simul fermentationem quandam subeant: Hinc pro variâ miscelæ atque humorum diversitate diversum quoque genus puris for-

formatur. Si humores lymphatici diversæ naturæ colligantur extra vasa & misceantur simulque acescant & fermententur, formatur pus ichorosum, si sanguis cum alio misceatur humore, dicitur pus saniosum, verum ut pus laudabile fiat, & bonum, requiritur mixtio lymphæ cum pinguedine qui duo humores si extravasati certâ proportionem misceantur abscessus ut plurimum efformantur; unde etiam observatur illas partes quæ hisce humoribus abundant, magis abscessibus esse obnoxias, id quod quotidie conspicitur in mammis mulierum. Hæ enim cum præ cæteris partibus, abundant duobus illis humoribus ad lactis generationem necessariis, frequenter etiam abscessibus infestantur: interstitia musculorum propter eandem rationem sedes ordinariæ abscessuum esse videntur. Quin etiam ipsa ossium medulla, in membranâ glandulosâ ossa interius investiente à sanguine secreta, & pinguedinis instar communis circulans in pus mutatur, quoties lymphæ per ossa porosa facta ad eam penetrat:
id

id quod observare licet in illis qui tophis laborant. Hoc enim in casu ossa dilatantur, molliora redduntur, (apertis iterum vasis eadem componentibus) transitumque præbent humoribus lymphaticis extravasatis & ipsis incumbentibus: id quod sæpius mihi observare licuit. Hæc autem puris formatio, & eo loci collectio cum dolore præ cæteris acerbissimo fieri solet: cum enim dolor abscessuum æque dependeat à partis extensione ac ab humoris contenti acrimoniâ, videmus partes illas quæ difficilius extenduntur majori dolore affici: sic ubi semel pus in ossium cavitatibus formatur, & propter ossium nimiam resistantiam per membranam medullam cingentem non possit foras prorumpere, atque hinc per totam ossis longitudinem hæc membrana prematur, necessario dolor intensissimus debet oriri, qui quidem nullis remediis cedit, nisi os ipsum in cavitatem usque perforetur, ut puri detur exitus. E contra vero partes hisce humoribus, lymphâ nempe & pinguedine non abundan-

dantes, abscessus non patiuntur, qualis est ipsum corpus musculi carnosum, quod nunquam abscessu infestatum vel pure repletum visum fuit, & si aliquando pus intra membranas scroti collectum observetur, à perinæo id ut plurimum originem suam habere solet, adeo ut si probe hanc rem examinemus, patebit pus proprie dictum solummodo ex lymphâ cum pinguedine mixtâ generari. Quod si remotis omnibus obstaculis spontè ex ulcere aut vulnere profluere possit, fit pus laudabile sive balsamum illud quo natura in sanandis ulceribus ipsa utitur: adeo ut nostrum tantum sit medicamentis topicis & instrumentis prospicere, ne aliquid hujus puris hæreat, ubi possit suâ morâ acescere, & consolidationem quam natura molitur impedire; quod quidem bestię continuo lambendo ex naturæ instinctu perficiunt, sed de his plura suo loco ubi de iis ex professo agemus, hæc tantum ad elucidationem casus præsentis adducta funto, & ad demonstrandum materiam illam in amnio repertam purulentam non fuisse.

A.

*Aperturam perduxi ad pedalem
longitudinem.*

Duplici de causâ hanc aperturam tantæ longitudinis feci, primo ut ablato foetu omnes partes separandæ facilius possent foras sese protrudere. Si enim tota cavitas ad imum usque fundum non fuisset aperta, pars certe magna materiæ separandæ simulque pus ex oris vulneris continuo fluens, & propter ægræ situm ad cavitatem illam prolabens, in ipsius parte infimâ subsederant unde à naturâ difficiliora superiora versus rejici aut expelli poterant; donec putredinem ex morâ concepissent, totoque hinc tandem sanguine infecto, certam mulieri mortem attulissent. Alia ratio fuit, ut foetum commodius absque omni violentiâ per vulnus possim eximere; si enim angustior fuisset hæc apertura, adeo ut hinc coactus essem vi aliquâ vulneri illatâ foetum extrahere, multa sane & graviora symptomata ex vulneris contusione orta procul dubio partes vicinas tumefecerant febremque auxerant, quibus ægra resistere tandem amplius non posset,

set, cum eadem febre continuâ ante operationem afflicta, jam summe debilis & morti proxima jaceret. Cæterum aperturas atque incisiones fere in omnibus operationibus chirurgicis, quoties corpus aliquod magnum extrahendum est, prælargas fieri oportere nempe ad præcavenda symptomata graviora, quæ certo certius aperturas minores comitantur, exemplis bene multis & observationibus confirmare possem; Atqui unum tantummodo hic proferam, quod pro norma esse poterit in reliquis id genus operationibus.

Sclopetarius in urbe Franequeranâ degens & herniâ intestinali jam ab aliquot annis magnâ laborans, quam tamen pro lubitu reducere & fere omnia intestina in abdominis cavitatem ubi vellet reponere posset, negligenter usque sine ullo subligari incescit; adeo ut intestina suo pondere peritonæum magis magisque indies dilatarent. Hic cum die quodam extra urbem exivisset, frigoreque se correptum sensisset, domum rediens intestina non potuit amplius in suum locum reducere, propter inflammationem & tumorem circa annulum; quæ

quæ symptomata brevi ita increvere, ut excrementa non solum per intestina, quæ jam in scroto continebantur transire non possent, sed illa quæ ad annulum usque pervenerant sursum regurgitarent & ab ægro evomerentur. Cum itaque in deplorato hoc statu versaretur & spes vitæ vix ulla superesset, advocabar ego circa undecimam vespertinam, & ægrum agonizantem inveni. Parte affectâ autem examinatâ maculas quasdam in scroto vidimus, gangrænæ imminētis signa infallibilia: Hæc autem omnia symptomata à strangulato intestino provenire discipulis meis aliisque adstantibus denunciabam, neque ullum jam remedium præter reductionem intestinorum, factâ prius aperturâ, superesse. Cum fomentationes aliaque ejusmodi remedia incassum fuissent applicata: denique periculum esse in morâ. Annuentibus itaque amicis ægroti, quamvis non magna spes boni successus jam tandem superesset, ad operationem me accingo, fatius esse credens, anceps remedium adhiberi quam nullum, præsertim cum ægrum si forte aliis de causis, at contra tamen is ex operatione ip-

sa non moriturum satis mihi constaret
experientiâ edocto operationem hanc
in Bubonocèle, si recte fiat, non esse
lethalem. Paratis ergo omnibus in hanc
rem necessariis ægrum cum lecto super
tabulam eo in situ posui ut pedibus stans
operationem possim perficere: Itaque
à scroti & productionis peritonæi aper-
tione incepti, ut intestina contenta de-
tegerem; quibus detectis digitum, con-
ductorem omnium optimum & simul
forcipem supra digitum introduxi,
scrotumque & peritonæi productionem
secundum totam longitudinem aperui:
quo facto præter expectationem appa-
ruere intestina crassa æque ac tenuia; in-
testinum enim Cæcum cum magna par-
te Coli & majore adhuc Ilii portione nu-
dum illico in conspectum venit, colo-
re omnium mutato, ob gravem & diu-
turnam illam strangulationem. Hoc
vifo majorem solito aperturam esse in-
stituendam statim dixi, ut facile & abs-
que ullâ vi aut pressione intestina in ca-
vitatem abdominis reduci possint. Si e-
nim apertura parva tantum fieret & in-
testina (quæ jam plus debito antea, u-
bi reductionem tentabant, compressa
fue-

fuerant) absque ulteriori compressione reduci non possent , procul dubio mortificatio [quæ jamjam imminebat] evitari non poterat. Aperto itaque scroto supra stylum cannulatum à latere intestinorum in cavitatem abdominis introductum , cultello annulum eo usque dilatavi ut indicem manus sinistræ facile supra stylum potuerim introducere ; quo facto extraxi stylum & supra digitum forcipe tantam aperturam feci per integumenta & tendines musculorum infimi ventris (qui annulum , per quem peritonæum sese prolongando una cum intestinis in scrotum delabitur , componunt) atque etiam per ipsum peritonæum ipsis subjectum ut absque ullo impedimento intestina tam crassa quam tenuia reducerem. Verum in reducendis illis difficultas alia inexpectata mihi occurrit, Coli nempe intestini cum productione peritonæi in ipso annulo coactio ; quam cultro separare coactus sum, & quamvis operatio inde retardata multo difficilior redderetur , peregi tamen eo cum successu ut reductis intestinis & futurâ in annulo factâ partibusque reliquis incisiss, æger statim sublevari se

fentiret, vomitusque cessarent placideque illa ipsissima nocte dormiret, magna cum febris, quæ antea aderat, diminutione, meliusque indies se haberet, & brevi, quamvis jam quinquagesimum ætatis superasset annum, sanaretur.

Ex hac historia non obscure colligi poterit, quanta cum ægrorum utilitate in hujusmodi casibus incisiones amplæ & majores fiant, adeo ut ausim asserere plerumque ob nimiam hac in re chirurgorum cautelam curationes ægrorum retardari, doloresque augeri, denique paucos dari casus ubi largius incidere non liceat & profecto non profit. Hoc interim lubens concedo in facie id esse evitandum propter deformitatem, in collo vesicæ idem prohiberi, propter urinæ incontinentiam, quæ frequenter nimis magnam incisionem eo loci factam consequi solet; ideoque in anisphinctere (quantum possibile est) pari cautione procedendum. Quocirca singularem hunc casum eo tantum fine hic proposui, nempe ut fatis clarè pateat, quam necessarium sit quandoque largius incidere, & non tantum esse periculi ex incisione peritonæi, quantum sibi per-

persuadent illi, qui pro metu hæmorrhagiæ caute nimis & parce incidendo symptomata interim alia auxere, non sine infelici operationis successu: Tantum abest ut existimandum sit Peritonæi vulnera esse lethalia. Non possum autem præterire quin hic addam quod mihi observare licuit in hoc ægro post sanitatem ipsi restitutam. Nempe herniam de novo propullulasse à latere factæ incisionis; cujus tamen cicatrix tam firmiter ossi pubis loco incisionis adhærebat, ut nullus recidivæ metus superesse videretur. Huic tamen ut in posterum caveret subligaculo se munire coactus est, quod quidem ipse antea ferre non poterat propter intestini Coli cohæsionem cum ipso annulo. Cum, inquam, hoc intestinum nullo modo tunc temporis reduci posset, compressionem ejus immediatam tolerare non poterat. Notandum etiam in transitu, quam inutilis sit operatio quæcunque in adultis, cum post incisionem licet annulus vel ligatura vel cicatrice occludatur, plerumque tamen vel à latere nova formatur hernia inguinalis vel à superiori parte hernia ventralis; eo nempe in lo-

co, ubi tendines magis laxi reperiuntur. Causa enim herniæ ordinaria est tendinum ad musculos abdominis pertinentium debilitas, qui relaxati, fibrarum suarum separationem facile admittunt: peritonæum enim quia solum sua vi ponderi intestinorum sustinere ipsisque incumbentibus resistere non potest, paulatim extenditur, & per interstitia fibrarum tendinosarum scrotum versus delabitur atque una cum intestinis herniam facit. In infantibus minus adhuc admittenda est hæc operatio, quia hi fere omnes dum adhuc crescunt ubi robustiores fiunt simplici subligaculo sanantur, dummodo hernia à prolapsu tamdiu impediatur, ut fibris annulum componentibus detur tempus sese contrahendi. Sed & hoc obiter notandum, nempe, in Galliâ, Italiâ, Hispaniâ magnam partem hominum herniâ laborare ob usum olei continuum [olei enim apud ipsos idem usus est qui apud nos butyri] & Franequeræ in Frisiâ tertiam fere partem incolarum herniæ esse obnoxiam ex continuo lactis ebutyrati usu. Itali quidem & Hispani utuntur oleo, quia illo abundant, longe magis

gis quam butyro: Franequerenses autem dum volunt otio indulgere, malunt per desidiam tenui victu & lacte ebutyrato vesci, quam labore & industria victum meliorem quærere & mereri. Sicut autem oleum in Italîs, Hispanis & Gallis, ita lactîcinia in Franequerensibus hernias frequentiores procreare possunt, corporis partes nimis humectando, lubricando, & relaxando.

*Tubæ Facies interior sub finem curæ
cartilaginem æmulabatur.*

Tubam Fallopianam naturaliter constitutam, nunquam in os vel cartilaginem mutari fatis liquet. Ergo ut explicetur hoc phœnomenon, quomodo nempe in præsentî casu hæc mutatio accidit, vel potius necessario fieri debuit; demonstrandum erit, quæ partis mutatio hic facta sit, & quid requiratur ad partium constitutionem quæ in cartilagineam aut osseam substantiam mutandæ sunt. Constat itaque quo magis humidô abundant partes aliquæ, & quo major in illas humorum cõpia influit, eo tardius & difficilîus easdem concreescere in osseam soliditatem, è contra autem
quo

quo minus humiditatis in se continent & quo rigidiore fiunt eo citius illas indurescere. Sic videmus omnes partes secretionibus inservientes, & per consequens magnum sanguinis affluxum, refluxum, humorique secreto transitum præbentes in ossa raro aut vix unquam mutari, è contra observare est membranas istas quæ maxima ex parte extendi-
nibus sunt conflatae, & tantam solummodo humoris quantitatem admittunt quanta ad nutritionem atque incrementum suum est necessaria semper fere in ossa mutari. Hæc autem (si ita loqui liceat) ossificatio quatenus vel citius vel tardius fiat tam in ossium conformatione naturali quam in accidentali multum à situs, & figuræ differentiâ dependet. *Quoad situm* ossificatio retardatur vel acceleratur, prouti membranae partibus magis aut minus humiditate abundantibus sunt appositæ vel impositæ, id quod clare patebit ubi de ossificatione à prima conformatione ad adultam usque ætatem posthac forte plenius tractabimus: sed id non est hujus fori. Hoc unicum pro exemplo addam nempe epiphyfes cartilaginofas substantiam ossis molliorem

rem tantum adipisci ; propter humoris magnam quantitatem continuo ipsas ambientem , & eo delatam ad faciliorem motum ; quæ tamen cartilagines, si casu forte aliquo humoris affluxus impediatur, statim in ossa mutantur : id quod quotidie observatur in ossium concretione & motus abolitione propter illius humoris defectum. Propter humiditatem nimia quantitate peccantem, ossificationem in totum impediri in hydrocephalo jam supra diximus. Hinc jam deducimus partium siccitatem requiri ad ossificationem , & omnia quæ siccitatem illam quoquomodo imminuunt , ossificationem pariter impedire. Sic continuus olei usus homines agiliores reddit , & in ipsa senectute tardiores tendinum ossificationem efficit , quia nempe vasa illa sanguinem oleosum vehentia difficilius occluduntur, & diutius mollia , atque recipiendo sanguini apta permanent.

Figuram ossificationi vel celeriori vel tardiori aliquid etiam contribuere , demonstrant totius corporis nostri ossa , quorum in prima conformatione ea pars citius in osseam duritiem concrevit quæ maxime elevata est atque gibbosa. Sic in cranio videmus indurationis initia eo loci primo ap-

parere, ubi partes magis sunt prominentes & elevatae, non autem in centro vel medio (uti olim voluerunt) cujus ratio est satis evidens ex prædictis: nam ubi circulatio pigrior & difficilior est ibi vasa facilius concidunt atque occluduntur & propter defectum humoris eo citius rigescunt atque in duriores ossis substantiam abeunt.

Jam itaque tandem examinabimus quæ mutatio facta sit in hac nostrâ membranâ tubam adeo dilatatam constituyente ut indurationis ejus ratio liquidius elucescat. Hujus igitur membranæ superficies interna olim glandulosa fuerat quo melius secretioni inferviret majoremque sanguinis copiam admitteret, at jam tandem, deficiente humore mutata est in aridam & exuccam quæ sanguinem vix ullum recipiat.

Extracto siquidem fœtu omnis superficies interior glandulosa fuit separata, membranæ autem pars exterior quæ superfuit vasis jam contractis & propemodum clausis in siccam & fere exanguem pelliculam mutata sensim exaruit. Quæ quidem siccitas ex humoris defectu necessitate quadam huic parti duritiem adferre debuit: nempe qualis in plurimis etiam cicatricibus eandem ob causam observatur, quia ubicun-
que


que partes conglutinantur, ibi vasa simul occluduntur usque adeo ut humoribus vix transitus præbeatur. Accedit & hoc quod cutis instrumenta sudorem secernentia fuerint deleta, unde & minor humoris affluxus & major penuria. Sed ut hæc nostra tubæ facies interior cartilaginis substantiam præse ferret, requirebatur adhuc partis figura gibbosa: hanc autem magna ex parte, ab intestinis aliisque partibus in infimo ventre contentis habuit. Quæ (quia tanta in hoc casu à foetu crescente ipsiusque humoribus resistentia non obstitit, quin sua mole pristinum locum facile occuparent) membranam Tubæ ipsorum ponderi & compressioni cedentem in partes contiguas ita impulerunt, ut figuram abdominis gibbosam tanquam à proplasmate acciperet. Hinc major difficultas transeunti sanguini oborta majorque vasorum occlusio & partis rigiditas facta est, quæ tandem cartilagineam hanc duritiem tubæ induxerunt.


Hæc interim tubæ indurata membrana cicatricem præmuniens, & per totam ejus circumferentiam ubique cum peritonæo coalescens tendinum in operatione transcisforum defectum utcunque supplevit. Hæc enim janua cartilaginea nisi à naturâ femper

per providâ fuisset efformata atque ante ostium illud collocata, profecto hæc foemina ea facilitate foetus in utero gestare non potuerat, præsertim gemellos quos triennio post curationem hanc peractam peperit: Abscissis enim tendinibus qui abdominis partes præcipue continent ac coërcent, vulneris ora sibi invicem ita appropinquare non potuerant, ut absque ulla intercapedine conglutinantur, obstante partium suppuratarum exitu per ipsa futurarum interstitia: ideoque eo loci à foetus pondere & incremento tanta extensio acciderat ut vi expultrice omnino abolitâ, hernia ventralis inevitabilis atque immensa succrevisset. Quippe tendinum fines abscissi atque in hac parte induratâ concreti, nec satis validi fuerant & actiuosi ad foetum excludendum, & prolapsui intestinorum insolito certo certius secuturo resistere non potuerant.

Plura adhuc restant, Vir ornatissime, quæ in hoc casu notatu digna commentarium plenius fane & uberius postulent. Sed hæc hæctenus. Nam & ego Epistolæ modum mihi videor excessisse, nec te diutius morari debeo gravioribus forte curis & negotiis districtum. VALE.

F I N I S.





8/1906

